

Wadau Waipongeza e-GA Kuleta Mageuzi ya Kidigitali Serikalini



WADAU wameipongeza Mamlaka ya Serikali Mtandao (e-GA) kwa kuendelea kuimarisha mifumo ya TEHAMA Serikalini na kuongeza ufanisi wa utoaji huduma kwa wananchi.

Wakizungumza katika kikao kazi cha sita cha Serikali Mtandao kilichofanyika jijini Arusha, wadau hao wamesema juhudi za e-GA zimekuwa chachu ya kuharakisha mageuzi ya kidigitali Serikalini na kuweka msingi imara wa utekelezaji wa Dira ya Maendeleo ya Taifa 2050 kupitia huduma jumuishi, salama na zinazowafikia wananchi popote walipo.

Kampuni ya Yas

Mkuu wa Miradi ya Kimkakati kampuni ya Mawasiliano ya YAS, William Mpinga, amesema kampuni hiyo inaunga mkono jitihada za Serikali katika kujenga Serikali ya kidijitali, kwa kuimarisha mawasiliano na huduma za fedha kidigitali.

Amesema, dhamira ya Yas ni kuwa mshirika sahihi wa Serikali katika kuhakikisha wananchi wanapata huduma rahisi na jumuishi, akibainisha kuwa kampuni hiyo imewekeza zaidi ya shilingi trilioni moja kuboresha miundombinu ya mitandao mijini na vijijini.

Ameongeza kuwa Yas kwa sasa inaendesha mtandao mkubwa wa 5G nchini unaofikia zaidi ya asilimia 95 ya wananchi na kuhudumia zaidi ya wateja milioni 29. Kupitia ushirikiano na Mfuko wa Mawasiliano kwa Wote (UCSAF), kampuni hiyo inaendelea kupanua huduma ili kuhakikisha Watanzania wote wananufaika na fursa za kidigitali.

“Yas itaendelea kuwa mshirika madhubuti wa Serikali katika kujenga taifa lenye mifumo imara na huduma jumuishi kwa kushirikiana na e-GA na taasisi nyingine,” amesema.

Kampuni ya SoftNet

Kwa upande wake, Mkurugenzi Mkuu wa SoftNet, Nuru Yakubu Othman amesema kikao kazi hicho kimekuwa jukwaa muhimu la kukutana na wadau wa TEHAMA, huku akibainisha kuwa kampuni hiyo imeshiriki mikutano yote tangu ilipoanzishwa.

Amesema, SoftNet imeendelea kushirikiana na taasisi mbalimbali kutekeleza miradi ya kidigitali na sasa inatoa huduma nchi nzima, ikijikita katika miundombinu ya kidigitali, usalama mtandaoni, utawala wa mifumo pamoja na huduma zinazohusisha Akili Unde (AI).

Aidha, ameeleza kuwa kampuni hiyo inaendelea kuimarisha kitengo cha mafunzo ili kuwajengea uwezo wananchi na watumishi wa umma katika matumizi sahihi ya mifumo ya kidigitali.

Kampuni ya SOPHOS

Naye, Mwakilishi wa kampuni ya SOPHOS, Rajkumar Popat ameeleza kuwa Tanzania inapiga hatua kubwa katika mageuzi ya kidigitali, jambo linaloongeza umuhimu wa kuimarisha usalama wa mtandao.

Amesema kadri huduma za Serikali zinavyozidi kuhamia mtandaoni, ndivyo haja ya kujifunza na kujikinga dhidi ya matishio ya usalama mtandaoni inavyoongezeka, akisisitiza kuwa usalama wa mtandao ni muhimu katika kulinda wananchi, taswira ya nchi na uchumi wa taifa.

Ameahidi kuendelea kushirikiana na Serikali na e-GA katika safari ya kulifanya taifa kuwa salama kidigitali.

Tume ya Maendeleo ya Ushirika

Mrajisi wa Vyama vya Ushirika na Mtendaji Mkuu wa Tume ya Maendeleo ya Ushirika, Dkt. Benson Ndiege, amesema kwenda kidigitali ni hatua muhimu katika kuimarisha maendeleo ya ushirika nchini.

Amesema mifumo ya kidigitali imewezesha upatikanaji wa takwimu sahihi na kusaidia kudhibiti changamoto za ubadhirifu na upotevu wa mali zilizowahi kujitokeza katika vyama vya ushirika.

Ameeleza kuwa, kwa kushirikiana na e-GA, tume hiyo imeanzisha Mfumo wa Usimamizi wa Vyama vya Ushirika (MUVU), ambapo hadi sasa vyama 6,466 vimesajiliwa na vinatumia mfumo huo katika shughuli zao za kila siku.

Dkt. Ndiege amewahimiza wadau wa TEHAMA kuendelea kushirikiana na vyama vya ushirika kwa kutoa mifumo, vifaa na ushauri wa kitaalamu ili kuongeza ufanisi na tija katika sekta hiyo muhimu ya uchumi.

